



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

BD

100

D88

1663

A

688,063



BD

100

.D88

1663

Laurens

6-

~~11~~
11



50

SOLUTIONES ALIQUOT
QUÆSTIONUM,


Quibus vera

PRIMÆ PHILOSOPHIÆ

Principia aſtruuntur.

OPUS METAPHYSICUM

FRANCISCI DULAURENS.



HAGÆ - COMITIS,

Ex Typographia ADRIANI VLACQ,

ANNO MDCLXIII.

BD
100
D88
1663

41

20-43
1989

Illustrissimo Domino,

M O M M O R I O,

Regi à Secretis, & libellorum supplicum
Magistro; cæterisque Academiæ M O M-
M O R I A N Æ præstantissimis Viris, Dominis
meis colendissimis.



Abores, & conatus, quos in ve-
rioris Philosophiæ principiis rite
ponendis adhibui, vobis liber iste
vestro nomini dicatus exponet, Il-
lustrissimi quotquot estis viri, exi-
miique Philosophi. Frustra me de-
sudasse non arbitror si vestris
sublimibus ingeniis scripta mea placuerint; Nam
vos in eruenda veritate, rimandisque naturæ arcanis
solertissimos novi, quibus verba dare difficile est. Vos
vulgari, ac infelicitè in scholis trita via relicta, di-
recto tramite ad scientiarum culmen affurgitis, &
solo lumine, quod in mentibus nostris natura accen-
dit, ut meliori duce utentes liberrimam ac tutissi-
mam colitis philosophandi rationem. Vestro exem-
plo, nullis Philosophorum placitis, sed argumentis
tantum è puro naturalis luminis fonte petitis instru-
ctus, ad hoc opus scribendum accessi; quid in eo
præstiterim vestrum esto iudicium, mihi certe fir-
mam de Dei existentia demonstrationem, rem & ad

bene Philosophandum, & ad bene vivendum sum-
mopere, necessariam videor attulisse, hunc saltem
scopum mihi proposui, quem attigisse, & omnibus
hac in parte satisfecisse ex animo optarem, ut mihi,
& reliquis hominibus simul quod boni viri officium
est, prodesse possem. Nihil enim in tota vita magis
est necessarium quam ipsum vitæ Authorem probe
agnoscere, & non vacillantem de eo habere opinio-
nem. Et quamvis Deum esse Sacri Codices nobis fi-
dem habentibus persuadeant, hæc tamen veritas in
dubium revocatur ab iis, qui fidei lumine carentes
sacrarum scripturarum auctoritatem rejiciunt, quo-
rum mentes alia ratione quam exarati verbi testimo-
nio ad Dei cognitionem adducere oportet. Id effi-
cere in primis mihi curæ fuit, & omnibus pariter
ostendere ex rebus maxime obviis, quales sunt mo-
tus & dubitatio, impressa esse ubique in mundo, &
in nobis divinitatis vestigia. Hæc est totius operis
conclusio.

Ad id autem vobis offerendum duæ potissimum
me impulerunt causæ: prima, singularis quidam
erga Academiam vestram cultus, & observantia,
quam ut renatam Socratis, vel Platonis Scholam
aspicio, ubi disertissimi placide Philosophantium,
& pulchra pro veritate decertantium sermones, non
vero inanes acerbè disputantium, & nullius rei quam
gloriæ, victoriæque cupidorum altercationes audiun-

tur:

tur : Secunda quod me in cœtum vestrum recipere dignati estis , cui cum aliquoties in ædibus Illustrissimi Domini Mommorii interfuerim , & à nonnullis audiverim id moris esse ut singuli Academiæ cultores aliquid meditati per ordinem afferant , quod congressus initio pronuncient , ut symbolum meum cum reliquis adesset vehementer optavi. Est sane quod ætas nostra miretur , nobiles Gallos in maximis Galliæ dignitatibus constitutos, dum à curis , negotiisque vacant , animum relaxare Philosophiæ studio. Vos post Platonem Philosophorum nomine compellare audeo , qui beatam Rempublicam fore pronuntiavit, cum Magnates in ea philosopharentur. Beata ergo Gallia nostra, quæ tot insignes alit Philosophos. Valete viri undiquaque ornatissimi, & solita benevolentia fove

Vobis addictissimum

FRANCISCUM DULAURENS.

PRÆ-

P R Æ F A T I O

A D

L E C T O R E M.

A Salomone humana sapientiæ oraculo pronunciatum est sapientiam à Deo esse, & cum illo fuisse semper: quibus verbis significare nobis voluit illam extra Deum reperiri minime posse. Summus ille rerum opifex puteus est altissimus, in quo veritatem occultari dicebat Democritus, quam erueri hominibus nefas esset, cum in tanti numinis fulgore condere-
tur. Sapientiam tamen possidere se plerique credunt homines, quamvis illa soli Deo conveniat, amoremque sapientiæ miseris ab ipsomet sapientiæ rectore concessum, ut ejus numen agnoscerent, & in ejus contemplatione felices aliquando degerent, in suam plerumque perniciem, summumque tormentum mali amatores convertunt. Et vero Dei contubernium ideo sapientiæ assignatum ausim dicere, ut in illo tanquam in abyssu profundissimâ æternum delitesceret, & ut ab impuris hominum mentibus inviolatus custode Deo permaneret sanctissimæ rei thesaurus. Itaque recte divus Paulus nos tantum ex parte cognoscere affirmavit, tota enim certitudo nostra ex nobis est, quæ quantum imbecilla sit, fragilis naturæ nostræ conditio testatur. Hoc innuere volebat Protagoras cum hominem veritatis mensuram esse diceret, neque enim existimandum est, ut multi Philosophorum putant, illum de reali veritate loqui voluisse, quæ proprie loquendo nihil est aliud quam rerum essentia, cujus quidem homo mensura non est, sed

sed tantum de veritate objectiva eum intellexisse credibile est, hoc est de veritate in quantum illam comprehendimus, nam per ideas quas de rebus habemus, veritatem, aut falsitatem eis assignare solemus.

His ego imbutus præceptis humano more sapere institui, hoc est ingenii mei vires exercere in iis solum quæ captui meo accommodabuntur: Ideoque sacram Theologiam, majestate sua venerabilem, ejusque mysteria ultro sine examine credenda mihi proponens, res ceteras examinare, earumque causas pro viribus anquirere consilium inii. Ut autem omnes videant quantum in hoc studio proficere possum, prima Philosophiæ meæ fundamenta promulgare decrevi, mihi non inutile futurum arbitratus: si quis enim iudicium meum subterfugerit error, corrigendi dabitur ansa; si vero ita stabilita sunt fundamenta ut ad quosvis objectionum impetus inconcussa permaneant, iis omnino confidere non dubitabo. Scias autem, erudite lector, valde Metaphysicum esse hoc opus, si arriserit, bonis ominibus proseguere utilitatis tuæ causa aliquid ausum (ea enim mihi mens in scribendo fuit ut meis tuisque commodis simul inservirem:) sin aliquid in illo male conclusum, aut reprehensione dignum invenias, quæso ne me hoc celes, si enim ad ea quæ objicies respondere nequeam, ingenue fatebor errorem, meque hominem esse meminero, tibi pollicitus hanc me gratiam summi beneficii loco semper habiturum si plus mihi per tuam censuram sapere liceat. Restaret de operis textura, & de scribendi modo aliquid disserendum, sed opus exiguae molis evolve, & hæc omnia tibi nota fient.

INDEX QUÆSTIONUM.

QUÆSTIO I.

Utrum aliquid sit in intellectu, quod prius non fuerit in sensu.

QUÆSTIO II.

Quid primum in scientiis querendum sit, & quis assequenda veritatis modus habeatur.

QUÆSTIO III.

De rei simpliciter sumptæ proprietatibus.

QUÆSTIO IV.

Utrum necessario aliquid existat & utrum illud unicum sit.

In hac ultima concluditur Deum primo & maxime ab intellectu cognosci.

QUÆ.

Q U Æ S T I O P R I M A ,

ejusque solutio.

Utrum aliquid sit in intellectu , quod prius non fuerit in sensu.

Vetus est opinio diuturni temporis autoritate potius, multorumque magis approbata consensu, quam ullo rationis judicio confirmata, quæ certitudinem & cognitionem nostram à sensibus ortum habere contendit. Hoc opinionis commento imbuti fere omnes veritatis testimonium in sensuum fide positum esse sibi persuadent, & pertinaciter affirmant nihil esse in intellectu quod prius non fuerit in sensu: sed quam leves ob causas id receptum, quamque simul parum verisimile sit jam ex parte demonstratum est à Cartesio, qui fidem non exiguam sensibus ademit annotatis eorum erroribus, tantumque sua probatione effecit, ut qui ad ejus scripta diligenter attenderint ob rationum evidentiam cogantur fateri, temerarium & incertum esse judicium omne, quod de rebus ex sola representatione à sensibus facta decernitur; sed quoniam nihil non allatum est ab ipso, quod ad hujus rei probationem attinet, nihil hic addendum superesset, nisi quod receptam ob sententiam inde sequatur, nullam igitur certitudinem dari, nec

A

ullam

ullam unquam cognitionem acquiri posse, de qua non liceat semper dubitare: nam si verum est ut supponitur, nihil esse in intellectu quod prius non fuerit in sensu, quandoquidem sensus est fallax, nulla erit notitia in nobis, in qua non sit timenda deceptio: quamobrem ut huic maximo malo per nos etiam succurratur, docendum nobis est quomodo multa ex se percipere possit intellectus nullis sensuum adjumentis, quamquam hoc etiam aliquatenus præstitum sit à Cartesio; verumtamen operæpretium facturum me arbitror, si novo rursus argumento rem eandem conficiam; fieri enim poterit ut ii qui rationibus ab ipso allatis nondum acquievere, nostris probationibus convincantur, & sic male stabilitum totius philosophandi rationis principium ab omnibus deinceps Philosophis tanquam perniciosum repudietur.

Contemplemur itaque mentem nostram, num quid intelligendi, sive cognoscendi facultate à natura prædita est, quam eadem rerum parens sensibus denegavit, ita ut in hoc potissimum differre mentem à sensibus palam sit, quod hi res simpliciter apprehendant, illa autem res apprehensas intelligat, atque cognoscat. Jam vero intelligentia nostra sola veri comprehensione perficitur; intellectus enim in rebus præter veritatem inquirat nihil, hujus solius assequendæ studio naturam scrutatur, ad hanc solam operando respicit,

respicit, & in ejus affecutione, velut in optati finis fruitione tandem conquiescit. Hinc nulla res eatenus mentem afficit, quatenus est colorata, vel sonora, vel aliquo ejusmodi accidente vestita; quæ sensus nostros movere solent, sed eatenus tantum ipsius cognitioni subjicitur, quatenus est vera; quia igitur verum, & ens inter se convertuntur, manifestum est unamquamque rem per solam entitatis suæ notam ab intellecta comprehendi, unde nulla alia causa assignari poterit, cur mentis cognitioni res aliqua subjici queat, quam quia entis caractere signata est, sive quia est aliquid. Nunc supponamus mentem existere (hæc autem suppositio necessaria est cum menti actionem tribuamus, actio enim entis existentis actio est) ex præmissis haud dubie sequitur, ipsammet suæ cognitioni nullo alio mediante subjici, quia ipsius existentia cognoscibilitatis ut ita dicam causa est, & conjungitur agens cum patiente, quod sufficit ad producendum effectum; est enim ipsa mens agens, & patientis simul, vel potius agit in mentem patientem cognoscitiva facultas, quæ ipsi est insita, & quæ ab ipsa saltem ratione distinguitur.

Mirum autem videri non debet in hac mentis operatione, videlicet dum mens seipsam contemplatur, quod agens & patientis unum ac idem sint, hoc enim omnibus propemodum naturalibus, & immanentibus

actionibus est proprium, in quibus termini pro vario solum respectu distinguuntur. Omne enim ens in quantum ens agit pro facultatibus sibi à natura tributis, non quod ulla vi externa cogatur ad agendum, hoc enim modo violenta potius quam naturalis esset actio, nec etiam quod ullo patiente externo sit opus, in quo actio recipiatur, nam hac ratione non esset actio immanens, sed ideo tantum agit, quia propriæ virtutis impulsu, velut naturali quodam artificio ad agendum ducitur, vires suas in se potens exercere.

Agnosco quidem rectum superioris argumentationis processum, sed ejus materia parem ac ipsa forma concludendi vim obtinere minime posse videtur. Etenim pro certissimo fundamento supposuimus ad hoc ut res aliqua mentis nostræ cognitioni subjici queat, nihil à parte talis rei desiderari quam essentiã, sive quidditatẽ: fortassis autem non animadvertimus, probatione nostra nihil aliud evinci posse quam ut concedatur, res omnes, quæ in aliquo entium ordine sunt constitutæ, hac de causa rerum utcumque cognoscibilium numero ascribendas esse: quod autem postea res illæ per solam hanc cognoscibilitatis notam humanę mentis captui omnino accommodentur, numquid inconsequens absolumque videtur? Nam ut v. g. rei non sufficit esse corporeæ ut audibilis dicatur, quamquam sola corporeitatis suæ ratione
sub

sub aliquem sensum utpote sub tactum cadere possit, sed adhuc requiritur ut sit sonora , nisi enim aliquem sonum ederet , nec ab auditu sentiretur. Pari etiam ratione quamvis res ob essentiam cognoscibiles dicantur , possintque sub hac simplici consideratione à quodam intellectu divino puta vel angelico percipi, aliud tamen in ipsis ad nostrum concipiendi modum entitate accommodatius requiri videtur, quod mancam , & debilem apprehensionis nostræ vim permoveat, quodque generalem hanc rei utcumque cognoscibilis significationem ad particularem humanæ mentis cognitionem determinet atque restringat: hoc autem fortasse est ut res aliqua talis sit, quæ possit sui specie vel imagine mentem afficere , vel certe si rei natura id non patitur , ut saltem intellectus illam sibi sub aliqua figura repræsentet , sicque semper affirmandum esset talis rei cognitionem dependenter à sensibus in mente nostra fuisse generatam.

Ad hanc objectionem solvendam duo examinanda sunt: inquirendum primo est utrum plures dentur intellectuum species ut sensationum; deinde utrum fieri semper debeat intellectio nostra per expressas aliquas imaginum notas.

Ad primæ partis disquisitionem necessarium videtur, ut entia intellectualia certos in gradus pro ipso-

rum differentia distinguam. Primo itaque se offert intellectus divinus, qui suæ amplitudinis immensitate cæteros omnes transcendit: sequitur angelicus, qui quamvis finitus sit nostro tamen amplior est: postremo humanus occurrit, qui est omnium limitatissimus. Jam si sumatur intellectus extensive, ut Philosophi loquuntur, hoc est quoad amplitudinem cognoscitivæ facultatis, & rerum intelligibilium multitudinem, dubium non est quin divinus ab angelico vel humano longe sit diversus, quoniam infinita est naturæ, & infinita comprehendit: angeli vero atque homines finitam habent intelligendi facultatem tum à parte intellectus, tum à parte rerum, ad quas eorum cognitio extenditur. Si vero accipatur intensive, hoc est habito ad operationis formam respectu, angelicas, atque humanas mentes unam eandemque cum intellectu divino naturam affinitate quadam sortiri comperietur, cuilibet enim intellectui rerum veritas pro objecto est. Et quamvis Deus dicatur alio modo res intelligere quam homines, ut quod ille unico mentis intuitu omnes comprehendat, quæ nobis hominibus non nisi exiguo in numero, longique sub ambage discursus innotescunt, illa tamen intellectio Dei formaliter à nostra non differt, quandoquidem ad unum & eundem finem acies mentis nostræ dirigitur, nos etiam ad veritatis contemplationem evehente ratione;

ne; Atque cum idem objectum per solam veritatis representationem intellectibus omnibus offeratur, hæc objecti identitas, atque hæc eadem tendentiæ ratio conformes actus pronunciant, proindeq; manifestum est intellectum divinum à nostro vel angelico facultate non differre; hoc est unius esse naturæ: conformes namque actus ab eisdem facultatibus, easdemque facultates ab eisdem naturis ortum habere necesse est.

Quod certe absque temeritate vel divinæ Majestatis imminutione dictum volo; nam sicut de numeris non male pronuncio, cum cifram, quæ numerus non est, ajo pertinere ad numerorum naturam, quia cifræ nihilitas essentiæ numericæ opponitur; ita etiam de Majestate Dei nihil detraho, quando infinitam intelligendi vim, quæ in ipso reperitur, cum nostra vel angelica quæ finita est comparo, atque ad eandem naturam pertinere dico, quia divini intellectus essentiæ angelici nostrive nihilitas opponi videtur. Quod autem intellectus noster, vel angelicus respectu divini pro nihilo computetur, ex eo patet: quod finiti ad infinitum nulla sit proportio, & quod multum vel paucum infiniti partes magis dici non possint quam nihilum, ut ad aggregandum numerum infinitum perinde est, sive millenarios, sive denarios, sive denique cifras accumules.

Quæ

Quæ cum ita sint, patet solutio superioris objectionis quoad primam partem, nempe quod plures non dantur intellectuum species ut sensationum, sensus enim diversas in species abit eò quod in objecto sibi proposito diversa consideret: nam modo circa colores, modo circa sonos versatur, quæ duæ qualitates cum inter se valde discrepent, necesse est plures dari in sensitivo potentias, quæ huic corporearum affectionum diversitati ex adverso respondeant. Intellectus vero hac ratione dividi nequit, siquidem conformes esse omnes intelligendi actus monstratum est, cum ad idem objectum eodem semper modo determinentur, & in unum verum tendant. Quod si tota intellectuū latitudo distinctionem aliquam patiatur, hanc tantum secundum amplitudinis, aut perfectionis gradus fieri probavimus, non secus ac qui multum videt distinguitur ab eo qui parum videt, vel ut denarius numerus à centenario, & centenarius ab infinito distat; plus autem vel minus diversa genera, vel diversas species non constituere lumine naturali notum est.

Supereſt Quæſtionis ultima pars, cujus difficultas in eo posita est, ut ſciatur utrum res aliquas nuda perceptione, hoc est absque ulla idolorum fictione comprehendere possit intellectus noster, an vero quasdam simulacrorum species efformare coactus sit
ad

ad quarumcumque rerum notionem sibi comparandam. Quamvis autem hoc quæsitum per antecedentis objectionis responsionem prima fronte tolli videatur, revera tamen non tollitur, neque enim profecto ex eo quod uniformes sint entium intellectualium operationes, denturque intelligentiæ, quæ res absque phantasmatum ope percipiant, ulla ratione consequitur nos etiam idem præstare posse, quia rerum per phantasmata perceptio diversitatem in operatione non importat. Unde quemadmodum senes, quorum debilior est oculorum acies, nihil legere possunt nisi perspicilia prius oculis admoveant, ita etiam potest contingere ut nos propter infirmam intellectionis nostræ vim nil nisi per phantasmata debilitati nostræ se accommodantia percipere valeamus. Sed ne rem valde claram, ac per se manifestam inutili verborum expositione reddamus obscuram, attendamus solummodo quam ratione numeri, substantia, existentia, & alia ejusmodi multa à nobis percipiuntur, & comperiemus illa omnia nobis non repræsentari sub ullis imaginum formis, sed sola intellectionis nostræ vi, ac mente in se collecta comprehendendi, unde quæ ex eo petebatur dubitatio plane tollitur.

Porro si mens ad seipsam cognoscendam sensibus indigeret, ideo procul dubio foret, vel quod natu-

ram suam phantasticæ cujusdam figuræ umbra prius
ementiri deberet, vel certe quod in cognitionem sui
minime devenire posset, nisi res alias ante perspexis-
set ex quarum objectiva præsentia etiam se esse conse-
quenter inferret. Primum dici non potest, nam antea
probavimus multas res à nobis percipi, quarum nulla
phantasmata menti nostræ obversantur, eam autem
esse mentis nostræ naturam, ut larvatam aliquam sui
speciem à sensibus emendicare necesse non sit, ex offi-
cio sensuum apparet, quorum munus est rerum extra
mentem positarum species animo repræsentare, mens
autem, quæ sibi semper adest præsentissima quomo-
do tali sui specie à sensibus efficta indigeret?

Quod ad secundum attinet, verum quidem est re-
rum externarum notitiam quandoque posse menti
nostræ occasionem de se ipsa cogitandi præbere, sed
non ideo quis inferet, illam rerum externarum noti-
tiam menti semper esse necessariam ut seipsam con-
templari valeat, sive mentem nostram alio se modo
cognoscere non posse. Ut neque verbi gratia pro-
blemate geometrico, à quopiam casu reperto, rectè
diceretur illud via Geometrica reperiri non potuisse,
nam multoties accidit ut oblata fortuito problemata
mechanice primum, deinde Mathematica quadam
ratione ostendantur. Cum autem probaverimus
mentem nostram res externas non solum, sed etiam se-

seipsam comprehendendi capacem esse, illaque omnia in se complecti, per quæ quotiescumque libuerit intueri se valeat, omnino manifestum est rerum externarum notitiam ad hanc mentis operationem non semper esse requisitam.

Præterea quando mens per rerum externarum notitiam in cognitionem sui deducitur, non ideo se cognoscit, quia tales res apprehendit, patet enim quod idem faceret, etiamsi alias apprehenderet, nec etiam quod ullas apprehendat, sed ideo tantum se cognoscit quia cogitat, sic enim ratiocinatur, cogito ergo sum: Unde bene quidem tunc dicetur rerum externarum notitiam de se cogitandi occasionem menti præbuisse, sed cum ad solam mentis operationem, sive ad cogitationem à re cogitata abstractam tantummodo respiciatur, non nisi valde improprie dici poterit, illam quam de se mens eo tempore acquirit cognitionem à rerum externarum notitia dependere. Tandem dico, quod si mens ad se conversa in seipsam figat obtutum, semet absque sensuum ope comprehendet ob jam allatas rationes: postquam autem seipsam sic comprehenderit, si naturam suam penitus inspiciat, generales entis, finiti, existentiae & multarum rerum quæ Metaphysicæ dicuntur ideas acquirat, quod hæc ex illis sequantur.

Qua propter mentem nostram sensibus huc usque

mancipatam ab hoc indigno servitutis jugo liberemus; fateamur illam ad res percipiendas quandoque sensuum opera indigere, quandoque vero eorum auxilio non uti. Agnoscamus fecunditatem hujus mentis, quæ tot tamque varias rerum notiones ex se ipsa producendi capax est, melioremque ineuntes philosophandi rationem, hanc tanta virtute præditam facultatem certitudinis omnis matrem, originemque proclamemus.

QUÆSTIO SECUNDA,

ejusque solutio

*Quid primum in scientiis querendum sit, & quis
assequendæ veritatis modus habeatur.*

QUandoquidem antiquæ Philosophiæ principium erroris falsitatisque convicimus, aliud nunc moliri par est, cujus certitudo, atque constantia renovato Philosophiæ nostræ operi stabilitatem polliceatur. Sed quia maxima animi contentione opus est ad tale principium rite ponendum, me ipsum deinceps quasi meditando alloquar, nam mentis acies plus vigoris habet ad solam veri investigationem intenta, quam si duplici veritatis inveniendæ, aliisque explicandæ labore fatisceret: sic igitur incipio.

Jam

Jam satis adverto plerasque in mente mea generari posse notiones, quibus producendis inutilis omnino foret sensuum usus; non ignoro etiam quantum sit fallax horum sensuum fides, qui circa ea quæ quotidie explorant multa peccare, & vanis imaginibus mentem eludere consueverunt: Verum hæc nova speculatio in tam difficiles scopulos anxiam mentem primo in limine abripit, ut hinc evadere fere desperem. Nam si sensibus meis huc usque ita credidi ut quæcumque ab iis veniebant pro indubitatis acciperem; & si malo hoc principio semper usus sum, ut nihil verum admitterem nisi quod à sensibus hauriretur, suspecta mihi esse debent hætenus credita omnia, ita ut opinionum mearum nulla non debeat à me rejici; Deinde si quid ideo rejiciendum putarem, quod per dolosos sensuum transitus ad mentem comesset, numquid hac ratione omni sensuum usu mentem meam destituerem, pulcherrimarumque rerum cognitione privarem? nihil enim earum, quæ corporeæ dicuntur ad ipsam dimanaret, & hæc tam vasta cognoscendi facultas, cujus vis pene infinita videtur, arctissimos haberet exercendæ potentiæ limites, si sola sui contemplatione mens contenta illam intra se cohiberet, nec latius evagari fineret. Dum ad hæc attendo nullum aliud scopulis hisce me eripiendi patet iter, quam ut rationes examinem,

propter quas sensibus meis antehac confidebam; id autem causæ erat quod firmissime persuasum habebam, sensibus accepta esse referenda quæcumque mens cognitione sua complecti potest; unde illud omne quod sensuum vehiculo ad mentem perveniebat, ex eo solo quod per sensus, tanquam per fidissimos rerum exploratores immissum erat, certissimum judicabam, neque postea diligenti mentis inquisitione pervestigabam, utrum tale foret, quale per sensus repræsentabatur, sed ex ipsa repræsentatione revera se sic habere arbitrabar; atque hinc pravum nascebatur judicium, quod non ab accurata rei cognitione, sed à perversa mentis dispositione proficiscebatur; erat vero perversa mentis dispositio, siquidem intellectus in ejusmodi judiciis de rebus sibi non bene perspectis judicium ferebat, cum contra rectus rationis usus exigit ut de iis tantum quæ menti diligenter attendenti perspicua sunt, judicetur. Nunc mihi facile est in altum tranquillumque emergere, nam quia res per sensus immixtas ad rationis examen non bene revocavi, consequitur opiniones omnes, quas de eis sic concepi, dubias esse, ideoque à me rejiciendas, sed quia solum idcirco dubiæ sunt, quod imprævio rationis lumine conceptæ fuerint, non vero quod per sensus transierint, haud propterea menti meæ sensuum removetur usus, cautela tantum adhibe-

hibetur ne sensibus deinceps ullum assensum præbeat antequam quid rei sit ex seipsa cognoverit.

Verum in id incumbenti mihi, & veteres opiniones omnes ex animo meo rejicienti difficultas inde suboritur, nempe si rejectis iis omnibus, quæ me recte scire semper putavi, omnium restem ignarus, necesse erit sciendi principium à summa rerum omnium ignoratione petere, quod fieri non posse videtur; omnis enim scientia quibusdam præcognitionibus nititur: satius igitur esset illas omnes percurrere, & diligenter examinare singulas, ut deprehensa falsitate veritatem in ipsas inducerem. In hac ancipiti cura defixus agnosco talem esse mentis meæ naturam dum ad res se convertit, ut ex una cognita facile in alicujus alterius cognitionem deveniat, quæ ultima semper à prima dependet; ideoque me unam rem perfecte cognoscere debere, quæ prima sit, aut ex primis, si modo multæ primo rerum in ordine dari possunt, & vera, & à qua cæteræ vel pleræque fidem accipiant, ut de illarum veritate certus esse possim. Jam vero cum dubia sint ea omnia, quæ olim vera esse existimavi, satis video in eis rem illam non contineri, quæ prima requiritur ut sit aliarum firmamentum, cum ratio persuadeat, certum non esse id, quod minimum dubitationis admittit: neque veteres opiniones mihi erunt resumendæ ut
carum.

earum defectum corrigam postquam primam illam perspectam habuero , cum ex hujus cognita veritate sequentium aliarum longa series per complexionem trahatur , quarum omnium certitudo primæ illius robore constantiaque firmabitur ; neque etiam ab ignorantia initium faciam , quin imo ab evidentissima ratione , si pro fundamento supponam aliquid , quod perfecte cognoscam verum esse , & à quo reliqua inde pendentia demonstrationis vim accipiant. Principiorum enim diligens observatio viam præbet ad reliquorum omnium inventionem paratissimam. Quin imo qui plenam habuerit principiorum cognitionem , is jam perfectam , licet nondum explicatam , omnium quæ ab eis deduci possunt scientiam adeptus est , cum longæ illæ consequutionum series , quas scientias vel disciplinas nominamus , in fœcunditate principiorum totæ condantur , & à sola eorum efficacitate profluant.

In primis igitur allaborandum est ut rectum & quam maximè clarum de principiis conceptum efformemus ; eorum deinde naturas , & his naturis debitas proprietates accurate examinando , quas ipsa vires , quamque potentiam ad operandum habeant , parvo laboreprehendemus , unde postea difficile non erit varios modos excogitare , & ex iis simplicissimos eligere , quibus singula quæque ab his principiis

cipiis orta gignantur : Atque his duabus rebus , nimirum exacta principiorum definitione , & simplicium modorum , per quos quodcumque ab eis pendet effici & fœliciter explicari queat , inventione , plena perfectaque eorum cognitio comparatur , qua semel imbutus , atque fœcundatus intellectus , tanta postea rerum copia ditescit , tantaque luce collustratur , ut connexarum invicem effectuum numerosissimam multitudinem , adhibita præsertim in eis ordine deducendis solerti industria , tanquam uberri-
mos parturientis cognitionis fructus effundere , & ex multo sinu proferre valeat. Sed antequam hoc opus aggrediar , cogor dubitare de omnibus , ut pravis opinionibus mens exuta tutam , & ab omni erroris contactu liberam judicandi facultatem exerceat.

Sane hæc argumentatio clara est , sed parum firmitatis habere , & tota ex falsi principii petitione exsurgere , atque confici videtur , quo collapsò ruere integram & destrui necesse est. Etenim ex eo quod de omnibus dubitandum esse duxerim , nonne consequitur mentis meæ naturam à me nondum agnosci posse ? quod si hoc confiteri oportet , nã ego incautus si hoc falso principio abutar ad alia concludenda. Maximis profecto versor in difficultatibus , & magis operosum negotium suscepi , quam unquam fuissẽ arbitratus ; quocirca parumper sistendum est hoc in

loco usque dum ex his laqueis me expedivero , & iter aliquod explanaverō , per quod postea remotis omnibus insidiis cursum meum tuto dirigere valeam.

In primis notandum occurrit , quando dico mentis meæ naturam à me agnosci , nihil aliud hic intelligi debere quam me ratiocinari , vel rationem quocumque modo percipere. Licet igitur ex eo quod dubitem nihil adhuc certi noverim , indeque sequatur ignotam esse mihi mentis meæ naturam , atque etiam me esse , si hoc (videlicet me ratiocinari) supponam , nonne hac suppositione facta modis ad ratiocinandum necessariis uti , hoc est rationem confutlere debeo ? Et cum ipsa me primo admoneat naturam hominis ita esse comparatam , vel si falsum sit esse hominem , ejus naturam ita fore comparatam si esset , ut una res ipsi cognita alterius afferat cognitionem , profecto rationis necessitate adigor ad id credendum verum esse , atque etiam ad omnia quæ inde recte colligi possunt , pro veris habenda : Et quamvis fingi posset nullum esse hominem , nihilominus tamen inde non sequeretur illum non fore talis naturæ si esset , sed tantum illum nec esse , nec ullam habere naturam ; pari etiam ratione quamvis res omnes dubias esse supponam , si quid tamen in eis adverterim , quod sit rationi consentaneum , concludi

cludi non poterit ex eo quod dubias illas esse suppositui, tales non fore si essent, quales fore judicavero, sed tantum illas nec esse, nec ullam habere naturam. Verum hoc difficultatem non tollit, semperque restat probandum quomodo supponam me ratiocinari, cum adhuc de mei existentia incertus sim, nam si falsum sit me esse, etiam falsum erit me ratiocinari, & consequenter falsa omnia quæ ratiocinatione concludam. Insuper hoc concessio videndum est quæ sciam à ratione me admoneri.

Quantum ad primum attinet, si recte attendatur nullus erit dubitandi locus, & manifeste apparebit talem suppositionem ob aliam omnino causam fieri quam ob quæstionem, ideoque necessarium non esse ut verum sit suppositum, quoniam quæsitum quod ab illo non pendet, ab illo etiam determinari non potest ad veritatem, aut falsitatem; primo enim quamvis falsum esset me ratiocinari, non ideo sequeretur falsa esse omnia quæ cum ratione concluderem, quale est illud quod de hominis natura paulo ante concludebam, sed tantum me nihil concludere posse. Deinde cum ratiocinari nihil aliud sit quam ratione uti, quis non videt rationem priorem esse ratiocinatione? quapropter sublato omni ratiocinante remanebit tamen integra ratio, sive veritas in rebus. Duplicem enim statuo rationem, unam in rebus pono;

cui proprie veritatis nomen debetur, alteram in mente confidero, per quam primæ cognitio acquiritur, & velut aliqua veritatis figura in mente adumbratur, atque hæc alio nomine ratiocinatio dicitur. Cum igitur primaria illa ratio, five veritas, quam in rebus locum, & sedem habere monui, nostrâ sit antiquior, ut ostensum est, & sine illa perseverare valeat, clarum est ipsam à mente mea nullo pacto dependere: Etsi enim ea sit ipsius natura ut percipi possit, nemine tamen percipiente revera existit, quoniam posse percipi extraneum est à veritatis essentia. Jam facile intelligo etiam si non existerem, neque ratiocinarem, indubitata tamen omnia esse debere, quæ rationis vi confirmarentur. Sed quænam igitur causa me movet ad faciendam aliquam suppositionem, cum nulla necessitas adesse videatur aliquid supponendi? Nimirum cum attenta mentis consideratione investigandis rerum naturis, earumque causis noscendis incumbere, si quod verum in eis est demonstrante ratione mihi manifestum appareat, illud statim à mente mea apprehenditur, quæ ut sibi, aliisque id quod ita apprehendit, exhibeat, ratiocinationis ope indiget, per quam tantummodo facultatem rerum veritas exhiberi potest. Atque cum nulla res ideo vera sit, quod ipsam mente complectar, vel quod cognitionem meam alteri notam faciam (docuimus enim omni
cogni-

cognitione priorem esse virtutem) profecto nequit ab ea suppositione, quæ propter id solum facta est, assertionis meæ veritas ulla ex parte labefactari; & quamvis omnino necesse sit ut supponam me ratiocinari, omnis tamen ista necessitas à parte mei, sine quo suppositio nulla fieret, existit, quæ necessitatis causa aliena est, & à veritatis acquisitione disjunctissima. Sed hoc adhuc evidentius erit si hic meus sermo veritati tribuatur; nunc placet audire loquentem. Neminem fore confido, qui hæc cogitans non malit rationum momenta expendere, quam ea quæ nihil ad rem pertinent curiosius exquirere. Fieri enim potest ut mentem non habeam, nec omnino existam, at numquam continget ut verum non sit, quod firmis rationibus demonstratum erit.

Itaque suppositio nostra valeat. Sed jam quibus signis agnoscam à ratione me admoneri, sive aliquid esse verum? veluti quod superius dicebam, sic à natura comparatum esse hominem, ut per unius rei cognitionem, alterius notitiam adipiscatur, quæ ultima semper à prima dependet: quid me de hujus rei veritate certum facit? profecto id omnino manifestum fit ex ipsa ratiocinationis, sive argumentationis perceptione, quæ oratio est in qua quibusdam positis aliud quid necessario sequitur eo quod hæc ita posita sunt: quare cum duo hic reperiantur, quo-

rum voces, sive termini signa sunt, tanquam præsentis acie mentis intueamur.

I I.

Quæstio distinguenda est, id est videndum quot in quæstione quærantur, ut distribuatur quæstio in tot partes, quot erunt in ea difficultates: hac enim ratione difficultates omnes melius perspicientur, & examinationi melius quæstio præparabitur.

I I I.

Unaquæque difficultas separatim, & ordinatim examinanda est, hoc est exactissima quæsti de quo est difficultas divisio secundum quæstionem facienda est, removendo scilicet ab eo illud omne, quod ad propositam quæstionem non faciet, ut solum appareat id quod in quæstione erit, illa enim hoc modo veritati præparabitur melius.

I V.

Sic intellecta, distincta, & examinata quæstio iudicii arbitrio committenda est, & inventæ regulæ beneficio per demonstrationem solvenda, aut solutionis impossibilitas per eandem ostendenda.

Atque his de quæstionum examine traditis præceptis cum adjuncto canone, certissima continetur veritatis assequendæ methodus.

Sed quoniam de rerum omnium essentia & existentia incertus sum, irritus labor videtur ulterius progredi velle: quid enim de non existentibus demonstrari

strari potest; nam si existere illa credam quæ existentia carent, procul dubio aberrabo: quod si illa non existere judicans, ipsis tanquam existentibus essentias, & quæ essentiam comitantur proprietates tribuam, nonne etiam fallar? Equidem si temere, & inconsulta ratione id faciam, in hoc rursus peccabo. Verum si in nihili ut ita dicam penetralibus veritatis lumine patefactis res possibiles, siue quæ inde emergere possunt, eodem lumine mihi ostendantur, numquid illis proprias naturas assignans, adhuc in errore versabor? Certe ne id quidem suspicari possum modo fidissima veritatis tutela fretus sim, quæ mentem meam ab omni errore custodiet. Nam esto falsum sit, ullam rem existere ex iis, quibus essentias accommodare cupio, quid inde absurdi sequetur? An non ipsæ si quando existerent veris essentiis atque naturis induerentur? ita sane: posito enim quod res existat vera, & peculiaris ipsi natura debeat, igitur sine ullo errandi periculo rebus non existentibus essentias & proprietates affingere possum, quas habere deberent si quando existerent.

Quoniam ergo nunc de omnibus dubito, hoc est in summa rerum omnium ignoratione versor, placet cum liceat Geometras aliquo modo imitari, qui quæsitum aliquod tanquam concessum assumentes, continuatis eo usque consequentiis progrediuntur, donec

nec in verum aliquod concessum incidant, parum absimili ratione res non secus ac si existerent tantisper considerabo, earum essentias, & proprietates investigando donec aliquam invenero, cujus essentiae, & existentiae necessitatem mihi confirmet ipsa rationis necessitas. Quod si illa rerum omnium possibile causa sit à principio illo cognito, reliquarum notitia per synthesein acquiri poterit; sin minus, toties repetenda erunt analyseos nostrae vestigia, quot erunt inveniendae primae rerum causae. Nunc igitur in id sedulo incumbentes pergamus ad reliqua.

QUÆSTIO TERTIA,

ejusque solutio.

De rei simpliciter sumptae proprietatibus.

QUamquam propositum mihi sit rerum proprietates hoc in loco investigare, quia tamen illae in possibilitate subjectorum, quo modo hic considerandae veniunt; innumeræ delitescunt, neque singulis vel inveniendis, vel recensendis unquam sufficerem, delectum maximum adhibere debeo, easque solum ex innumerabili multitudine seligere, quæ ad institutum meum facere videbuntur. Hoc ut rite exsequi possim revocabo primum in mentem, quidnam

nam per hanc investigationem potissimum intendam, fine enim ob oculos posito, quæ ad eum conducent media facilius apparebunt. Nempe consilium erat rem aliquam primam quærere reliquarum omnium vel multarum causam, de cujus essentia, & existentia certus esse possim: quia igitur res illa sic descripta universalis esse debet ut manifestum est, generalibus solum rei affectionibus indagandis allaborandum est; sed cum nondum sciam utrum res aliqua detur, quærerum omnium possibilium causa sit, ratio persuadet ut in hac anquisitione à generalissimis rei proprietatibus incipiam, ad minus generales postea si ita sit opus descensusurus: nam si tale ens cæterorum principium existat; ejus essentiam nullis nisi primis, & præcipuis rei attributis decoratum esse oportet; illa igitur attributa quæramus. Ante omnia vero mihi maxime tenendum est, me ad nihilum delapsum esse, quod duplex animadverto; unum in quo rerum omnium repugnantia, atque contradictio reperitur, quod nihilum purum, siue impossibile dici potest; alterum in quo nullum tale dissidium invenitur; sed ex quo res ipso non contradicente emergere possunt, hocque nihilum possibile nuncupabo. Primum tenebrarum latibulum est, in quo subjecta nulla unquam luce illustrari, nullisve proprietatibus affici possunt, ideoque nulla alia consideratione di-

gnum est, in secundo solo immorabor, rerum ibi abditarum proprietates scrutando. Quod autem nihilum ita distinguî debeat, patet ex ipso possibilis atque impossibilis conceptu; possibile enim sumitur pro eo quod non est, sed esse potest; impossibile vero pro eo quod nec est, nec esse potest: itaque nihil in possibile, atque impossibile recte dividitur. Jam cum res subjectum purum dicatur entis aut nihili caractere nondum signatum, capax tamen utrumque, atque ideo proprietates eorum recipiendi; cumque nulla vera rei proprietas detur, quæ in ente fundamentum non habeat, clarum est primam rerum affectionem esse entitatem, cujus opposita & negata affectio nihilitas erit. Ens porro, sive res entitate affecta vel unica erit, vel multæ dabuntur; rursus si unica, vel erit simplex vel composita: si multæ sint, in illa multitudine numerus considerabitur, in numero vero ordo servatur. Hæc omnia ita se habere rationis evincit necessitas: quare cum dictæ affectiones ens solum quatenus est ens respiciant, & ex se invicem à prima necessariis & continuatis consequentiis deducantur, erunt primæ illæ & præcipuæ rei affectiones, quas investigabam. Atque ut illarum meminisse, earumque naturas facilius possim examinare, sic illas describo.

QUÆSTIO TERTIA.
GENERA METAPHYSICA.

Res.

Entitas.

Unitas.

Multitudo.

Simplicitas.

Compositio.

Numerus.

Ordo.

Nihil.

Nunc illa seorsim consideranda sunt. Per rem ut sæpius dixi intelligo subjectum quodvis entis aut nihili caractere nondum signatum, capax tamen utrumq; recipiendi: Verbi gratia, quando dico res est, vel non est, res est subjectum cui entitatem nihilitatem que attribuo. Ejusmodi subjecto hic opus habemus, quod ab ente, & nihilo abstrahat, quandoquidem de ente & nihilo sic sumptis agimus: ens enim & nihil de aliquo subjecto prædicari debent, unde oportet aliquid ab ipsis diversum excogitare, & supponere, cui entitas nihilitasque tribui possint, neque enim ens erit subjectum nihili, aut nihil subjectum entis, & multo minus ens sui ipsius subjectum erit, ne subjectum cum prædicato confundatur. Quod dico in ordine ad cognitionem meam, qui solus hic observandus relinquitur, non in ordine ad rerum veritatem, qui facile postea advertitur, & cum utroque modo rationis necessitas inesse possit, ideo ratiocinium in utramque partem

vocatur; ejus naturam hoc modo recte definiri nascitur, eo quod illa multitudini opponatur, & quod sola posita affirmataque multitudinem excludat. Secundo ut singularitatem quandam denotans, quam unitatem Metaphysicam multi indignant, & quam eandem entis sive potius rei, subjective restrictionem ab intellectu fictam jure nomines. Veluti quando vaga, & omnibus rebus communicabilis entitas ad singulare aliquod & particulare subjectum per essentiam contrahitur, tunc illa res essentiam adepta, una dicitur, eo quod entis diffusa significatio in unum quasi coarctatur, & certæ cuiusdam rei adhæret; unde etiam res, quæ prius entia omnia respiciebat, per hoc ad unum aliquod peculiare restringi intelligitur: Atque hic est verus unitatis Metaphysicæ conceptus, ex quo videre est quam male à multis Philosophis unitas illa explicetur, qui dicunt unum Metaphysicum illud esse, quod à seipso indivisum est; quasi vero res aliqua in se divisa vel dari, vel concipi posset. Idem omnino est ac si dicerent, unum Metaphysicum illud esse quod repugnantiam ab ente, aut à subjecto tollit; etenim rem aliquam à se divisam vel dari vel rite concipi repugnat. Hæc ab illis perperam introducta definitio litem nondum dijudicatam invexit, frustra disceptantibus inter se quidnam illa indivisio adjiciat enti, quo in loco mi-

ra figmenta afferunt. Sic multis erroribus ansam præbet male intellecta res.

Transeamus ad quintum & sextum genus, sive ad simplicitatis & compositionis considerationem. Simplex itaque dicitur quod partes non habet, sive quod est indivisibile; compositum vero quod partibus constat, in quas ultimo per divisionem resolvi potest. Primum perfectionis initium, secundum vero imperfectionis argumentum. Nam quod est indivisibile in eodem semper statu permanet, nec ulli obnoxium est mutationi, quod certe perfectionis est fundamentum ac velut basis. Contra vero quod est compositum atque divisibile, necessario pendet à partium ex quibus componitur copulatione, & mutuo fœdere, quo sublato ipsum compositum destrui necesse est, cum interim dum durat ob divisibilitatis noxam perpetuis alterationibus subjaceat, quæ omnia clara sunt imperfectionis indicia. Sed amplius, si simplicitas perfectionis principium non esset, entitas, vel unitas, aut multitudo illud sibi vendicarent, cum nullæ his superiores rei proprietates repèriantur: entitas autem, quæ nuda simplexque rei extra nihilum positio est, illud sibi non potest arrogare, alioqui res omnes entitate affectæ ideo essent æque perfectæ, si quidem omnes eodem modo extra nihilum ponuntur, habito solummodo ad positionem,

E

nem, sive ad emersionem ex nihilo, sicut vox entitatis innuit, respectu, quod absurdum est, cum unæ ab aliis in hac positione pendere debeant, hoc est, unæ aliis perfectiores esse: etenim causa, quæ essentiam tribuit, causato illam accipiente perfectior est: Neque etiam unitas illud sibi assumet propter eandem rationem; nam etiam singularitas, quæ per unitatem denotatur, omnibus entibus eodem modo competit. Enimvero quomodo ab unitate perfectio emanaret, cum unitas ad rei naturam non pertineat, sed ipsi per quandam intellectus fixationem ut vidimus tribuatur? multitudinem vero ab hoc numero excludi manifestum est, cum etiam ipsa non sit qualitas rebus inhærens, neque rem aliquam particularem, quæ tamen perfecta esse potest, respiciat. Restat ergo ut simplicitas, quæ prædictas affectiones immediate sequitur, & à qua perfectum quid dicitur, perfectionis radix nuncupetur.

Ultima duo genera nobis inspicienda supersunt, numerus videlicet, & ordo. Per numerum aliud in rebus proprie loquendo non concipio quam earum distinctionem, quamquam multitudo in numeri conceptu involvatur; sed hoc ideo accidit quod rerum distinctio, à qua numerus originem ducit, non possit nisi inter multa reperiri; & hoc omnino manifestum fiet si cogitemus nos de finita, & distincta mul-

multitudine conceptum formare, quoties rerum numerum consideramus: quando vero ad ipsarum multitudinem solum attendimus, tunc indeterminatæ, & aggregatæ cujusdam pluralitatis ideam efficimus. Verbi gratia, si forum ingrediar, & considerem multitudinem hominum ibi stantium, nec ad aliud quidpiam attendam, ingentem illam pronuntio, neque determino in mente mea quam ingens sit, illamque ut aliquod aggregatum intueor. Verum si numerum illius multitudinis scire velim, tunc hos homines seorsim accipio, & ex facta super singulos consideratione determinatæ alicujus multitudinis, sive numeri ideam acquirō, quæ mihi illos inter se distinctos repræsentat.

Ordo est rerum quælibet dispositio, quæ multis modis variari potest: hic duos tantum, causalitatis nempe dignitatisque ordines considerabimus, reliquis omisis, qui ad rem præsentem non faciunt. Est itaque causalitatis ordo entium causalitatis ratione affectorum dispositio per prius & posterius: In hac ordinatione entia quadam quasi concatenatione inter se dependent, quorum distinctio differentia proprie dici debet, in aliquo enim communicantia, in aliquo etiam differunt; ut contra diversa nuncupari ea quæ sola pluralitate distinguuntur; cumque causa prior sit, effectus vero posterior, hæc ordinata

series non male dispositio secundum prius, & posterius appellatur. Dignitatis vero ordo est entium apta dispositio secundum perfectionis gradus: In hac collocatione entia, quæ aliis perfectiora sunt, superiorem locum obtinere debent, quæ vero minus perfecta, in inferiori sede constitui. Atque hæc est generum Metaphysicorum, quantum ad institutum meum pertinet, explicatio.

Nunc operæpretium est ut videam quot modis proprietates illæ, five affectiones rebus tribuantur, hosque modos omnino duos reperio. Quædam enim prædictarum proprietatum rebus ipsis essentialiter inhærent, per quas ipsæ vel constituuntur, vel certam formam, five qualitatem assument; atque hæc veræ proprietates dicuntur, quas easdem qualitates, five habitudines appellare licet; quia illæ omnes ad rei naturam pertinent: hoc in numero entitas, simplicitas, & compositio solum accenseri debent; entitas enim rem ipsam constituit, simplicitas vero & compositio qualitates sunt, quibus rei natura specificatur: Reliquæ autem omnes, videlicet unitas, multitudo, numerus & ordo rebus non insunt, sed ipsis ab intellectu nostro per denominationem externam affinguntur, ut tanto facilius in earum cognitionem deveniat. Has ultimas rei affectiones proprio artis vocabulo secundas notiones appellavere

pellavere Philosophi, & quæ proprie accidentia dici possunt; illæ enim omnes ad rei naturam non pertinent, sed iis tantum utitur intellectus ad res claras percipiendas; juvatur enim per unitatem ad explicandam entis ad aliquod subjectum contractionem, quæ in essentiæ conceptu involvitur; multitudo vero instrumentum est, quo plures res unico perceptionis actu comprehendere possumus: numero utimur ad rerum distinctionem significandam: ordinem vero adhibemus quando res aliquas examinare, aut eorum meminisse volumus.

His itaque sic constitutis antequam ad rei primæ investigationem me accingam, reliquum est solummodo ut eam certis conditionibus vestiam, quo tantò repertu facilior evadat. Probavi in superioribus rem illam primam rerum omnium, vel multarum causam esse debere, hoc est à nulla superiori pendere. Nam si superior aliqua daretur à qua penderet, ex hoc prima non esset, quod cum ita sit, illa erit causa sui ipsius, hoc est nulla causa indigebit ad existendum, si quidem à nulla alia existentiam suam accipere potest. Quia vero essentia est rei extra nihilum positio, existentia vero rei positio extra causas, necessarium est ut res prima eodem temporis momento existat, quo illa extra nihilum poni intelligetur, quandoquidem existendi principium in se

habet, cum sit causa sui ipsius, atque hoc pacto illius existentia ab essentia distingui, sive dividi non poterit, & sic erit simplex. Quod si plures darentur causæ primæ, eas simplices esse, sive existendi principium in se habere eodem modo probaretur, cum eas à se invicem non dependere ex eo quod primæ esse deberent, intelligeretur: hoc in casu ad ipsarum multitudinem diligenter esset attendendum, quas per numerum postea distinguere oporteret, easdemque certo ordine disponere. Primum igitur omnium rem aliquam primam sagaci mentis indagine pervestigemus; visuri deinde utrum illa sufficiat ad res omnes possibiles producendas; tum reliqua ejus attributa prosequemur. Sed nunc tanquam de novo incipientibus de rerum omnium essentia, & existentia iterum dubitandum est.

QUÆSTIO QUARTA,

ejusque solutio.

*Utrum necessario aliquid existat, & utrum
illud unicum sit.*

JAm igitur cogitabo, nullam rem actu vel esse, vel existere, sive entitatem nulli rei, nullive subjecto adhærere, sed omnia densissimis immersa caliginibus
in

in nihili possibilis, & impossibilis profundo adhuc occultari. Verum id revolventi mihi magnus veritatis splendor affulget, qui me ex tantis dubitationum tenebris in aliquam certitudinis lucem adducit. Nam quia res à seipsis fieri, hoc est essentiam quam non habent sibi ipsis largiri nequeunt, ut clarissimum est, profecto rerum activa possibilitas (passivam enim possibilitatem, sive recipiendæ essentiæ capacitatem eas habere necesse est) in ipsismet non residet, sed in earum causis cum ipsarum essentia & existentia latet: si enim in ipsismet resideret, ex hoc suapte virtute ex nihilo emergere possent; neque id solum, sed & quæcumque vasto naturæ sinu comprehenduntur, necessario & ab æterno existerent; eodem enim temporis momento, quo existere possent, revera existere deberent, hoc est, ipsarum possibilitas ab earum existentia non distingueretur, siquidem existendi principium, nimirum activam possibilitatem in se recluderent. Quare cum res omnes necessario, & ab æterno existere nequeant, contradicente in primis causæ & effectus relatione, manifestum est in rerum causis absconditam esse earum possibilitatem. Atque hinc omnino colligitur aliquid vel aliqua necessario dari & præsupponi oportere, in quibus velut in incunabulis prima rerum initia, nimirum possibilitates activæ re-

con-

condantur, & ex quorum involucris liberatæ essentia manifestari tandem, & in apertum prodire valeant. Nam si talia non darentur, neque res possibiles ullæ darentur, cum non foret à quo possibilitatem suam acciperent. Verum hac probatione aliud non evincitur, quam ut concedatur, unum vel multa necessario dari oportere. Quamobrem si ad rerum diversitatem attendamus, valde proclives erimus ad concludendum, multas rerum omnium causas existere, & sic vel Mundum æternum, vel plures Deos esse facile probaretur, nullaque ratio suadet, ut hinc unum aliquod solummodo existere concedatur, quod tamen multi non satis acute philosophantes ex hoc firmissime probari contendunt: neque valet illa ratio quam afferunt, unum videlicet sufficere quod rebus omnibus essentiam impertiatur: nam cum diversæ sint rerum possibilitium essentia, ut ex sola generum nostrorum inspectione satis apparet, ideo probare oporteret, unam causam rebus natura diversis producendis idoneam esse, quod ex hoc impossibile est efficere; nihil enim juvabit si dicant illam causam omnes entis proprietates complecti debere, ideoque de ejus sufficientia non esse dubitandum, esset namque petitio principii, cum dubitetur talem causam reperiri, quod tamen hic pro vero sumitur. Melius sane isti si responderent, possibile esse quod
entitas

entitas in tota latitudine sua accepta, hoc est cum omnibus suis perfectionibus cuius rei adhæreat, sive quod unica rerum omnium causa sit possibilis, atque sic ut facile est illam existere concluderent; sed hoc adhuc infirmum esset, quia quamvis latissime sumptam entitatem alicui rei sive subiecto adhærere posse recte concipiam, nihilominus tamen illud mentis meæ figmentum esse supponere possum, ideo ab ipsa repertum, quo res omnes possibiles sub uno conceptu complectatur, plane ut apud Metaphysicos fieri solet, qui primariam solemnemque statuunt rerum in ens atque nihil divisionem, qua semel admissa necesse est ut realia quotquot existunt attributa ab entis generalissimi sic sumpti parte reponent, sive ut enti generalissime sic sumpto perfectiones omnes quæ certe enti, non nihilo debentur, assignent. Atque hoc modo entis summæ perfecti ideam à mentis nostræ facultate oriri posse fatendum est: sed & alia universalia sibi formare consuevit eadem mentis facultas, quorum ope quod in rerum natura divisum manet, in ipsa conjunctum, & indivisum reperitur; neque propter hunc indivisionis conceptum divisionem à rebus excludit intellectus: Verbi gratia, quamvis sub illa Bruti voce proprietates omnes, quæ in brutis dispersæ reperiuntur, in unum collectas concipiam, non ea propter judico
F brutum

brutum aliquod existere posse quod illas omnes possideat, id est quod sit Equus & Leo simul, aut Piscis Avisque simul, aut hæc simul omnia: pari etiam ratione quamvis per illam entitatis notionem perfectiones omnes, quæ in diversorum entium possibilitate delitescunt, in mente mea colligantur, non ideo judicare debeo quoddam eas extare posse, cui entitas sic accepta tribui, vel in quo perfectiones omnes, quæcumque dari possunt, contineri necesse sit, nisi aliis ad id credendum rationibus adducar, liquidoque constet non per aliquam intellectus fictionem, sed ante omnem mentis operationem aliquod ens revera dari posse ita completum, ut cum insigni perfectionum omnium ornamento emineat. Sed quia nulla rationis necessitas adhuc apparet propter quam illud possibile vel impossibile esse credere debeam, etiamnum in dubio relinquam utrum unica rerum omnium causa sit, neque propterea in alteram partem me convertam multa existere asseverans, quamvis horum unum certum sit, sed anticipiti dubiaque mente in utramque partem ambiguus distrahar, donec ad quam potissimum restringere me debeam superveniente rationis lumine innotescat. Itaque mihi iterum necesse est de rerum omnium essentia, & existentia dubitare, nec prius dubia mea deponam; quam aliquid invenero,
quod

quod verum esse mihi confirmet ipsa rationis necessitas.

Ac primo manifestum est, me nullam unquam de rerum essentia & existentia certitudinem habiturum, quando illas hoc modo dubias esse supponam: quam enim ob causam ea omnia, quæ olim vera esse credidi, non esse certa postea existimavi, nisi quod in eis semper aliquid dubii contineretur? Video horum cohærentiam, sed jam dubito de omnibus: quid inde colligi potest? An aliquid verum ex dubitatione mea nasci putem? Præfecto si nihil veri continet dubitatio, omnis tamen falsitatis expertus est, & antea necessarium duxi de omnibus dubitare, ut servata semper æquitatis lege ad veritatem accederem: Igitur quo me versam? Quid certum erit? Dicamne saltem aliquid esse? hoc præfecto dubitanti mihi non licet affirmare, neque etiam negare, sed ad utrumlibet indifferens esse debeo si æquitatem in judiciis servare volo, quoniam nondum clara sese aperit hujus propositionis veritas. Præterea si hoc affirmare possem, non amplius dubitarem, sed certam hac de re cognitionem haberem, quæ omnem dubitationem meam plane tolleret: si hoc etiam cum ratione negare possem, eodem reciderem, & quamvis nulla in me generaretur cognitio negando aliquid esse, tamen præfecto determinarer ad negationem,

neque mihi liberum esset ea de re amplius dubitare. Numquid asseverabo nihil esse? Hoc pariter affirmare vel negare mihi non est integrum propter eandem rationem, nam utrumvis dixerim dubitationem sustulero? Sed quò me præcipitem abripiunt hæ perplexæ dubitandi rationes? Ad non ens ex improvviso relapsus, etiam latebras ultra nihil scrutari videor, novisque iterum tenebris circumfundi, & omnia susque deque pervertere; affirmare non audeo; aliquid esse negare vereor, credere etiam non possum nullam rem existere, & tamen de his omnibus dico me dubitare, nodos scilicet nodis innecto, & pertexo ambages ambagibus. Quid tandem ex tanta contrariorum pugna orietur?

Equidem video quod si supponam me dubitare, nunquam potero cum ratione dicere quod aliquid est, vel quod nihil est, affirmando scilicet, negando vè, nam utrovis modo dubitatio mea periret, neque unquam illa se determinat, quin protinus deleta sit. Sed quamvis formaliter non affirmem vel negem dum dubito, impossibile tamen esset me dubitare, nisi utrumque aliquò modo facerem, cum enim dubitatio mea sit actus facultatis intellectivæ in quantum libera est ad assentiendum aut dissentendum, quod idem est ac liberi arbitrii actus; liberum autem arbitrium in eo tantum consistat, quod idem facere vel non facere;

id

id est, hoc in loco affirmare, vel negare possit, clarum est talem actum ab affirmatione & negatione simul produci, atque ita dubitationem medium quendam esse voluntatis inter illa duo extrema positæ statum, quæ dum hæret ambigua in quam partem præcise feratur, in utramque æqua propensione distrahitur, & quamvis, ut jam dixi, affirmationem & negationem formalem dubitatio non includat, tamen ex imminuta utriusque potentia illam exsurgere fatendum est. Jam vero affirmatio, quæ rebus aliquem statum tribuit dubio procul entis positionem infert; res enim per entitatem primario, ac fundamentaliter constituuntur; negatio vero quæ plane contrarium efficit, entis carentiam, sive privationem consequenter importat. Quamobrem colligere possum dubitationem, ad quam efformandam affirmatio negativæque ut supersus probavi concurrunt, non nisi ente ac nihilo præsuppositis fieri.

Nova hæc & prorsus inaudita de nihili præsuppositione conclusio omni rationi adversari videtur, ac repugnantiam manifestam involvere. Etenim poni quod nusquam datur, sive esse quod non est, hæc aperte inter se pugnant: sane diffiteri non possum, facile tamen agnosco hanc contrarietatem in rebus non esse, sed tantummodo in puris putis vocibus re-

periri, ac propterea inexistere, videlicet ob aliquem defectum qui est in me, & qui procul dubio causa est, cur non ens, sive nihil, ab ente distinguere non possim, quin saltem per aliquam verborum positionem, atque etiam per ideam quodammodo positivam id faciam.

Sed forte etiam non dubito, & hoc solum dico quia imaginor, vel fingo me dubitare; propterea fictitium erit, & falsum quidquid proferre conor. Imo quamvis minime dubitem, certum nihilominus illud omne manet quod rationis vinculis astringitur. Itaque omissa mei consideratione mentis aciem in summam rei fortiter intendam, & ut coëptis insistam vestigiis, eousque provecta est argumentatio, ut ens atque nihil ex natura dubitationis tanquam e latebris eruerim; quod profecto non parum videri debet; sed illud deprehendo maxima difficultate laborare: nam cum adhuc in nihilo possibili impossibilique verser, si dubitationis illa natura intra rerum possibilium attributa neutiquam appareat, hoc est, si res aliqua dubitans, vel dubitandi facultate prædita in possibilem numero locum habere nequeat, nihil dum effectum erit; quod si rem quandam ad cuius essentiam dubitatio pertineat, intra possibilitatis limites vere contentam cæca illa latentium rerum turba non operante intellectu parturiat,

riat, tum vero de entis nihilique seu vera, seu ab intellectu ficta positione quam necessario secum trahit dubitatio, nullus erit ambigendi locus. Vel enim res illa dubitans possibilitatem suam in se recludet, & sic necessario, atque ab æterno existet; vel adhuc in nihilo possibili hærebit. Utrovis autem modo entis ac nihili, ut ita dicam, præsentiam per essentiam suam amborum caractere quasi signatam, id est, per certam notam commonstrabit, nulla quippe falsitate rerum essentias adulterante. Inquiramus igitur utrum res aliqua dubitans in possibilitum multitudine delitescat; illam vero maxime possibilem vel primo mentis intuitu deprehendo, dum possibilitatis naturam contemplor; nulla enim in rei dubitantis positione contradictio vel repugnantia reperitur, quæ illam à nihilo possibili excludat, quamvis ex superius explicata dubitationis natura contrarium sequi videatur. Et hoc omnino manifestum fiet si recordemur dubitationem non esse meram affirmationem, neque etiam esse meram negationem, sed aliquid ex affirmationis, & negationis quadam velut permixtione confusum, seu melius loquendo aliquid imperfectum. Unde sicut nihil impedit quin ex contrariis albi nigrique coloribus inter se mixtis tertius exurgat color ab utriusque perfectione deficiens, ita nihil impedire videtur

quin

quin ex affirmationis atque negationis diminutis potentiis aliquid oriatur à pura affirmatione vel negatione declinans: statuamus igitur possibilem esse rei dubitantis naturam, quæ quatenus ab affirmatione dependet, de ente participare, quatenus vero negationem involvit, ad nihilum pertinere videtur. Atque hinc apparet rem dubitantem ab æterno existere non posse, sive possibilitatem suam actualem in se minime recludere: Illa enim propter negationem semper aliquid nihilitatis retinens nunquam penitus omnem tenebræ quietis caliginem exsolvere potest. Quod si illa ab æterno fuisset, nulla ne quidem minima nihilitatis umbra obsideretur; nam ab æterno entitatem suam possedisset, id est, ab æterno per essentiam suam longissima à nihilo abfuisset; ens enim & nihil quam maxime inter se distant.

Certum itaque est possibilem esse rei dubitantis naturam, cujus possibilitas necessariam infert entis præsuppositionem. Illud vero sic præsuppositum ens in tota significationis suæ latitudine accipi, sive ens summe perfectum intelligi debet, quoniam de omnibus dubitari potest, quod profecto fieri nequiret nisi entis ad dubitandum necessario præsuppositi natura, ad quam pertinere ambigitur id omne quod in dubitationem cadit, omnes quotquot existunt perfectiones

fectiones complecteretur. Atque ex his sequi videtur
revera, & ante omnem mentis operationem ens sum-
me perfectum dari oportere. Verum si cuncta rite
perpendantur, longe aliter rem se habere comperie-
tur. Nam quamvis rei dubitantis possibilitas, quam
veram & non falso à nobis introductam esse demon-
stravimus, necessariam entis positionem testetur, illa
tamen necessitas à parte mentis, ad cujus naturam
dubitatio pertinet, solum consistit: res enim dubi-
tans, sive potius dubitandi facultate prædita primo
est cogitans, intelligens, volens, nolens, sive etiam
affirmans & negans, quæ postquam aliquid cogi-
tatione apprehendit, cujus obscura perceptio ejus
sciendi desiderium remoratur, hæret incerta, flu-
ctuantisque dubitationem adhibet, qua bene prepara-
tur animus ad veritatem indagandam; deinde ne-
cessitate edocta, dum ad omnes ideas, quas apud
se reperit, se convertit, modum aliquem quo du-
biis se exolvat anxie quærendo, entitatem paulatim
à particularibus subjectis abstrahit, sicque entis sum-
me perfecti ideam, velut necessariam bene dubitan-
di, & consequenter bene cognoscendi regulam sibi
format. Quare licet dubitatio entis summe perfecti
positionem includat, explicata tamen mentis natura
non finit, ut ens summe perfectum extra intellectum
dari posse affirmem, antequam certæ probationes,

G

quæ

quæ id evincant, per motum animi in assensum ire
 coegerint. Interim non inanis erit facta circa dubi-
 tationis naturam inquisitio, imo multum lucrifere-
 ret, si qua via entis summe perfecti realis essentia
 atque existentia sit demonstrabilis. Quid enim præ-
 stantius, quid cum utilitate conjunctius, esse potest
 illi nobis, quam in omni dubitatione nostra præsen-
 tem & auxiliatricem habere supremi rerum om-
 nium Creatoris ideam, & impressam mentibus no-
 stris semper obversari excellentissimæ causæ imagi-
 nem? Quamprimum igitur ad ejus investigationem
 studium omne curamque convertamus. Placet tamen hic paulisper insistere, & mundo,
 sicut huc usque supposuimus, ideali, sive potenciali
 relicto, ad mundum factum & jam à nobis habita-
 tum transire. O quam decora rerum facies undi-
 que conspicitur! Numquid pulcher ille universi or-
 natus, pulcherrimus partium universum compo-
 nentium ordo, longe lateque Deum testantur? Quis
 micantia sidera cælo appendisset? Quis terram li-
 brasset in medio ætheris? Quis stans temporibus fru-
 ges nasci, Lunam singulis mensibus renovari, arbores
 foliis, floribus, & fructibus modo decorari, modo in-
 dem desitui juberet, & cætera naturæ miracula pa-
 traret, nisi quidam rector, & moderator adesset,
 cujus montes & consilio hæc omnia administraren-
 tur

QUESTIO QUARTA

tur? An res mirabili ordine dispositas casu talem
 formam assumpsisse? An orbés certâ legē sese mo-
 ventes, & nunquam à cursu suo aberrantes temere
 volutari credam? An potius tot clâris indiciis victus
 confitear tam affabre factam thundi machinam; Nu-
 minis alicujus, & sapientis & intelligentis opus esse
 debere? Egregia sane argumentatio, & si vim ha-
 beret omnibus anteponenda. Sed quamvis industriæ
 solertiaque plena sint sagacis naturæ opera, eorum
 que contemplatio animos nostros in admirationem
 rapiat, & vel invito nolentesque extimulet ad na-
 turæ auctorem dum illum agnoscimus maximis lau-
 dibus extollendum; illa tamen admirabilis munda-
 næ molis structura; aptaque partium dispositio, ac
 constans variarum rerum mutuis inter se fœderibus
 sociatarum fœdor non satis ex se solis validum argu-
 mentum præbeat ad potentissimū Numinis, quod om-
 nia ex nihilo creavit, creataque etiamnum conservet,
 noticiam mentibus nostris ingenerandam. Nam si
 mundum æternum esse supponam (quod mihi facere
 liberum est cum adhuc de DEI existentia incertus
 sim) motumque materiæ coævum assignem; quid
 mirum postea si cœli perpetua sibi que semper simili
 circumgyratione rotentur? si terra gravitate sua infi-
 mum sub aquis, ac levitate supremum super aquas
 locum constanter occupet? si denique omnia entra-

perpetuo agant secundum proprias vires, & tributas à natura facultates. Statim dicet aliquis id aliter contingere non posse. Imo subjunget si casu quodam aut alicujus Numinis (posito illud adesse) potentia turbata forent omnia, ut inde confusissimum Chaos, quale ipsum fingunt Poëtæ, exortum fuisset, miraculum foret si res hoc modo turbatæ ad eum quem nunc suspicimus ordinem succedente tempore non redirent, tunc enim potentissimi alicujus Numinis virtute opus esset, quæ rerum impetum cohiberet, vires suas exserere cupientium, & indefesso nisu propria loca, unde avulsæ essent, appetentium. Sed jam cum singula sibi debitas teneant sedes, & ad naturæ impulsu variis modis agitentur, nulla ne quidem minima divinitatis scintilla animos nostros percelleret, aut Dei sapientiam ex miro totius universi partium ordine agnosceremus, si materiam ab æterno extitisse, & sempiternos motus habuisse arbitramur, ut neque ullas brutorum animantium actiones quæ naturam ducem sequuntur credidit unquam maxima pars hominum à ratione & intelligentia, quibus ipsæ regantur, fuisse profectas. Verum postquam aliunde acquisita Dei cognitione imbuti accedimus ad naturæ operum contemplationem, tum vero Mundi ex nihilo creati aspectu mentes nostras stupor insidet, & ineffabilem summi rerum omnium

Crea-

Creatoris potentiam atque sapientiam mirari non definimus. Sed tempus est ut ad institutum revertamur.

Æternas quasdam entium possibilium causas, sive una sufficiat, sive plures requirantur, necessario dari constat ex ante probatis. Jam ad cognitionem meam ulterius promovendam nihil magis expeditum videtur, quam si ex tota rerum in nihilo possibili adhuc hærentium, aut quas in eo hædere suppono, multitudine, unam aliquam generalem, sive universalem, multas species sub se comprehendentem eligam: ejus enim consideratio haud dubie multum me juvabit ad causarum, ex quibus possibilia ortum habere necesse est, numerum determinandum. Summam igitur pro contemplationis meæ subjecto materiam, sive corpus, unde innumera pæne diversis formis prædita gigni, & in eandem resolvi posse ratio dicat. Ac primo antequam in materiæ, corporisve naturam ac proprietates diligentius inquiram, examinare debeo utrum res illa, quam materiæ corporisve nomine designo, qualiscumque sit, possibilitatem suam in se recludat, an illam ab aliqua causa mutuetur. In quo efficiendo non magna difficultas erit, si redeat in mentem præterita argumentatio, qua æterna quædam in rebus principia relinqui oportere conclusum est. Ideo enim ta-

lia superesse monstratum est; quod res possibiles, quæ suapte virtute ex nihilo emergere nequeunt, iis necessario indigerent, à quibus activam possibilitatem recipere. Quare cum æterna priora posteriorum hinc dependentium causæ sint, etiam universalis esse necesse est. Quoniam vero materia, quam considerandam mihi proposui, causa est universalis tot effectuum inde producibilium, ut integer Mundus ex ipsa vel prodierit, vel prodire valeat, & admodum paucas res apprehendam, quæ ex eadem constare non debeant, si causam assignem, quæ huic materiali causæ possibilitatem activam supplet, tertiæ causæ adesse debet, ut idem secundæ largiatur, quod secundæ primæ tribuerit: sed & quartam, quintamque admitti, & sic infinitam causarum seriem annecti necessarium erit, ut singulæ à proxime superioribus suas activas possibilitates nascantur; par enim est in omnibus ratio. Atque cum id fieri nequeat, tum quia in infinito causarum progressu ultima nusquam apparet, cuius tamen actualis positio omnino necessaria est, ut sequentes reliquæ possibiles dicantur, tum etiam quia natura, quæ simplicissimis modis utitur in operibus suis edendis, non efficitur per plura, quod potest fieri per pauciora, eò tandem rationis vi ad æctum me sentio, ut supponere tantisper opus habeam, materiam ab æterno existere, donec
ejus

eius naturæ consideratio hanc hypothesim vel destruat, vel confirmet.

Itaque ut hanc ultimam partem tandem aggrediar, materiæ corporisve clara perceptio nihil aliud mihi repræsentat quam extensum quid in longum, latum, & profundum; reliqua enim quæ materiæ tribuuntur, salva ejus essentia, ab ipsa tolli possunt, quod inductione patet; nam dura corpora emolliiri, mollia indurari, sonora sonum, colorata colorem, &c. sic de reliquis perdere valent, manente integra quam ante possidebant materia seu extensione, ut fuscioria à Cartesio, & nonnullis aliis explicatum est. Unde materiæ essentia in sola partium extensione quaquaversum diffusa consistit. Ad proprietates quod attinet, in genere dici potest alias à rerum essentia promanare, & consequenter ipsis perpetuo inharere, ita ut illis nunquam spoliari queant, alias vero extrinsecus ipsis advenire, quibus propterea aliquando carere possunt: & hoc universaliter omni rei, exceptis æterne existentibus, competit, nimirum ut essentialibus & accidentariis proprietatibus donetur. Verbi gratia, trianguli essentialis proprietas est, ut habeat summam angulorum duobus rectis æqualem, accidentaria vero ut sit æquilaterum: nullum enim triangulum invenias, in quo prima conditio desit, videlicet quod non habeat tres angulos duobus rectis æquales, at infinita trian-

triangula reperiuntur, quæ æquilatera non sunt. Atque hinc optima methodus colligitur ad dijudicandum, utrum cognita de re qualibet proprietas ei essentialis sit, an vero accidentaria: nam si ab ea sit separabilis, extrinsecam & adventitiam; si vero inseparabilis intrinsecam, & essentiae quoddam profluvium esse concludam: adeo ut inseparabiles proprietates materia à se habeat; separabiles vero, si tales in ipsa reperiuntur, aliunde acceptas.

Jam hac regula adjutus notissimas materiae proprietates vigilibus mentis oculis perlustrabo, & utrum quædam ab ea separabiles sint diligenter notabo: nam si talesprehendam, certus ero eas extrinsecus materiae advenisse, sive materiam suarum proprietatum complexum à se ipsa non habere. Inter omnes autem proprietates, quæ materiam afficiunt, longe eminet illa, quæ motus localis dicitur, & quem solum in rerum natura reperiri puto, quamquam multi Philosophi ejus notionem obscuraverint pluribus aliis commentitiis motibus introductis: verum illi suis inventis gaudeant, nobis de locali tantum sermo sit, qui recte mea quidem sententia definiri potest, dicendo eum esse in corporibus mutationem loci, vel eorum translationem ex uno loco in alium: nam quid sit locus lumine naturali probe noscitur: vel ut Cartesius, translationem unius corporis è vicinia corporum, quæ ipsum
imme-

immediate tangunt in viciniam aliorum, omnes enim hæ definitiones unum ac idem sonant. Præter hanc insignem materiæ proprietatem aliam adhuc animadverto etiam materiæ convenientem, quæ priori est opposita, & quies vocatur. Perfectam ejus notionem habebimus si concipiamus eam esse in corporibus cefstationem motus, vel affirmative loquendo, corporis mansionem in eodem loco. Hæc clarissima sunt, nec ullum de se dubium relinquunt, nam æque bene concipio quietem ad corporis naturam pertinere quam motum, & utramque qualitatem corporis affectionem esse nullo discrimine ratio nostra luce veritatis irradiata declarat. Ulterius igitur pergendo si materiam tantummodo mobilem, sive solo motu affectam considerem, nulla equidem ratio mihi apparet, propter quam motus ab extensione, sive à materiæ essentia proficisci queat; verum statim concludere non debeo, motum igitur essentialem materiæ proprietatem non esse, & consequenter extrinsecus materiæ advenisse, quoniam propter tenuitatem meam, & valde limitatum intellectum fateri cogor me omniscium non esse, ideoque multa in rebus profunde occultata latere posse, quæ mentis meæ aciem fugiendo, incomprehensibilia mihi sunt. At si motum simul & quietem in materia concipiam, vel si materiam contempler ut motus & quietis capace, quoniam motus est translatio corporis ex uno loco in alium, quies vero mansio

H

corporis

corporis in eodem loco, aut cessatio motus, perspicue cerno, idem corpus quod natura sua motus & quietis capax est, non posse simul in eodem loco manere, & in alium transferri, sive non posse simul moveri, & cessare à motu, hæc enim inter se pugnant. Proinde concludo corpus mobile quidem esse, sed aliquando motu privari, videlicet dum quiescit, & per consequens motum corporis proprietatem esse ab eo separabilem, eique secundum regulam nostram adventitiam atque extrinsecam, non vero essentialem. Quapropter materia sive corpus complexum suarum proprietatum à se non habet, sed motum ab ejus essentia minime promanantem ab externa aliqua causa impressum ei fuisse necesse est. Hinc ruit hypothesis nostra de materiæ æternitate, nam si æterna foret, complexum suarum proprietatum à se haberet, & motum independentem à causa hanc ei proprietatem tribuente possideret. Sic quam æternam durationem materiæ male assignabam, in causam motricem transferre jubet ratio. Hujus causæ naturam dum scrutor, invenio primo eam materialem non esse, nam alias eam à superiori aliqua causa motum accepisse oporteret, eodem modo de illa superiori, & de alia quæ superiorem anteciret nullo fine sermo esset, videlicet illas causas aut immateriales esse, aut ab aliqua antecedente motum accepisse: quare cum propter jam allatas rationes ejusmodi progressus in infinitum admitti non debeat,

nec

nec per plura fieri quod potest per pauciora, sequitur in prima causa quæ materiæ motum indidisse oportuit, sistendum esse, fatendumque eam immaterialem esse, atque etiam æternam, siquidem nullam habet supra se à qua pendere possit. Manifestum est etiam illam motricem causam motum non habere formaliter, sed tantum eminenter, sive per potentiam, quoniam ratio me admonet motum localem solis corporibus, non vero aliis entibus quæ corpore carent, convenire posse. Æterna igitur causa quæ materiæ motum impressit, aliquid quod formaliter sive revera non habet, motum videlicet, alteri dedit; ergo omnipotens est, cum dando id quod revera non habet, omnipotentia actum exercuerit; ergo etiam sola, & unica æterna: nam si plures essent æternæ causæ, nulla foret omnipotens, una qualibet potentiam aliarum non exercente. Tandem cum creatio ad omnipotentiam, ut præcipua ejus actio, referatur, fatendum est causam illam ab æterno existentem & omnipotentem reliquas res olim creasse, & jam creatas conservare, Mundum administrare, ac cætera efficere quæ possunt à sola omnipotentia proficisci.

Nunc itaque quo volebam pervenit argumentatio mea, nunc illudens summe perfectum intueor, non ut vanum mentis meæ figmentum, sed ut essentiæ meæ authorem, mihi perpetuo colendum adorandumque; impressa jam ubique video divinitatis suæ

